



h

Detalji filmske potjere na Ilidži: Pucao zbog ljubomore, s Otesa pobjegao držeći krim-inspektora na nišanu

Objavljeno: 23.07.2017. u 14:12

Tridesetosmogodišnji Aldin Džaltur iz sarajevskog naselja Hrasnica trenutno je na kriminalističkoj obradi u MUP-u Kantona Sarajevo, nakon pravog haosa koji je izazvao jutros na Ilidži.

Džaltur je uhapšen danas u Hrasnici nakon dramatične potjere koja je uslijedila nakon što je pucao iz pištolja na parking u ilidžanske Termalne rivijere.

Sve je započelo jutros oko 9.45 sati, kada je on, kako nezvanično saznajemo, pucao u pravcu automobila muškarca, za kojeg je navodno sumnjao da ga supruga s njim vara. Ispostavilo se, međutim, da to uopće nije bila ta osoba na koju je ciljao.

Odmah nakon toga, Džaltur se dao u bijeg prema naselju Otes. Došavši u blizinu podvožnjaka u Barskoj ulici, ispred sebe je na cesti udario u automobil BMW. Potom je izašao iz vozila i sukobio se s vozačem BMW-a, želeći mu oteti auto. Vozača je udario šakom, razbivši mu arkadu. U tom trenutku, sasvim slučajno, cestom su naišli pripadnici sarajevske krim-policije, koji su bili na putu ka poslu.

Vidjevši dva vozila i krvavog vozača BMW-a kako leži, istražitelji su su zaustavili auto i istrčali da pomognu, misleći da se radi o saobraćajnoj nesreći.

Džaltur je tad iskočio iza vozila i uperio pištolj krim-inspektoru u glavu. Držeći ga tako na nišanu, uskočio je u svoje vozilo, kojim je potom udario u policijsko vozilo, a zatim nastavio dalje bježati. Ne želeći dovoditi u opasnost živote građana u naseljenom mjestu, policajci su ga pustili da pobjegne, obavijestivši o tome patrole na terenu.

Džaltura je policija konačno sustigla u blizini zgrade u kojoj stanuje, u ulici Igmanškog bataljona u Hrasnici, gdje su ga izvukli iz vozila i uz upotrebu sile, uhapsili.

VEZANI TEKST - Drama u Sarajevu: Pucao na Termalnoj rivijeri, na Otesu skrivio udes, pa uhapšen u Hrasnici

On je predat u prostorije Osjeka za zadržavanje uhapšenih osoba MUP-a KS, a nakon kriminalističke obrade će, najvjerovatnije biti predat u nadležnost tužioca sarajevskog Kantonalnog tužilaštva uz izvještaj o počinjenih više krivičnih djela među kojima su izazivanje opće opasnosti, napad na službenu osobu, pokušaj razbojništva...

Vozač BMW-a je, kako saznajemo, nakon ukazane ljekarske pomoći, pušten na kućno liječenje i na sreću nije zadobio teže povrede.